

67376

*Si ufriç deste monade
a la vittime renegade
di quel morsi d'obliete
de che presit in se ne vade.*

Dispense N. 4 Presit 80 cent. Conto Corrente postale Une dispense al mès 30 Jugn 1929 - VII

ARCHIVI

de leterature furlane

antighe e moderne

*Biele lenghe furlane fortunade!
cu-mò sará di te pûr fate stime
e plui d'ogn'altre tu sarâs loldade.*

GASPAR CARABÈL (Rumtôt)
cirche 1630

Cheste dispense 'e contèn:

Guidón Salvadi (Guido Podreche) - LA STRIE
par i ans 1891 e 1892.

Costantin Smaniotto - TITUTE LALELE
comèdie in tre aç.

Tite di Sandri - Mi clamin rose... - poesie.

Su la Grafie dal Furlán — Recensión.

Cu-la publicaçion de quarte dispense il letôr nò-l pò plui dubità che l'**Archivi** nò-l vebi di vivi. Viarzin quindi un abonamént a 10 dispensis al presi di 8 franchs par l'interno e di 10 par l'èstero. L'impuart si pò spedì cun mínime spese su-l **Cont corint postâl N. 8-69 Udin, plaçe Vitorio Em. 9 A.** Indicâ da quale dispense si intind sei abonâç.

I abonâç dirèç e' gioldarân ches-c vantâç:

- 1) Di ricevi al presi di cost cuviartine, frontespiçi e indiç par leâ il volûm;
- 2) Di podè ritirà la dispense o lis dispensis riservadis tiradis in limitatissim numar di còpiis par i studiôs, che contegnarân i branos di caratar masse libar;
- 3) Di ricevi al stess presit ancje lis dispensis che varân, in sfueis separâs e in ciarte patinate, i ritrâç dai benemerîç de lenghe furlane. Lis ilustraçions sarân nome pa-i abonâç.

Dopo finide la publicaçion des poesiis di Podreche, si scomençarân a dâ fûr des ôparis di un o l'altri fra ches-c tre autôrs in gran part inediç: **Eusebi Stele** di Spilimberg, **Florendo Mariuçe** di Ciampfuarmid, **Cont Tite Puarte** di Udin. La quinte dispense varâ quatri ritrâç.

Si ricuarde che i Rivenditôrs e' han l'obligh morâl di rimandâ in bon stât lis còpiis non vindudis e di pajâ chês che nò tornin indaûr, sençe bisugne di sei sbordonâç.

Stabilimént Tipo-Litografich **BEPO TABÀCH** — Sandenêl dal Friûl

Dispense imprestade, jé dispense piardude o almanco uastade

TITUTE LALELE ~ Comédie in 3 aç di C. SMANIOTTO

(Continuaçion dal second at)

TITUTE — (*J sighe daür*) 'O ven áncie iò a judâ-ti.

CÁNDIDE — (*stand dentri*) Guai a lui.

TITUTE — Ben, ben... orpo 'o mi dismenteavi de lètare a siôr Meni su la fiestone di Udin. J máncie pôch (*al si sente dóngie il taulín e al scrîv*) 'O hai voe che mi rivi a Udin daur-mán... O, benón, eco... e cumò tornin-le a léi parcè ch'ò podarèss 'vê dismenteât alch. (*al léi áncie i comênc che son fra paréntesi*)

Siôr Meni benedét, (*al tete quând ch'al sint a dî cussî*)

“ Surisins nò-l'há tirât el cûl in-daür e fat di mancûl di mandâ la so rapresen-
“ tançe a la fieste furlane. — El confenón de Comune, Venânçio Vigolato
“ assessôr ançian e i pompîrs e' bastaressin di be'-soi par indicâ pulidût el
“ ciantón plui sclet de Furlanie. El sindich Basandiele, la figure porche che
“ duc i Furláns e' cognoscin, (*o puèsc ofindi-lu che nò-l ciape bote*) nò-l'ha
“ podût vignî in persone a Udin, pa-la quâl el dotôr Venânçio Vigolato
“ assessôr de Comune, al mi è capitât in buteghe e mi ha dite: Sior Tita
“ doman ela la va a Udine a prelevar la siora Lussia e Esterina che le
“ torna dal mar (*fòssin-o restadis lá in eterno*); la fassa un piasser, cara ela,
“ la vegna cun noaltri alla festa della zornada furlana. Sior Anzelo Basandella
“ dopo tornà dai bagni (*al'è stât áncie lui a lavâ-si lis sachetis, chel brigant*)
“ el ga una mossa de corpo impressionante, e chi meglio de ela, Sior Tita
“ benedeto, pol-lo mai onorar una festa cossì granda?

“ Noaltri gavemo ela, Sior Tita, gavemo el nostro Sior Tita (*ce zinar*
“ *d'aur*), gavemo insomma el nostro futuro podestâ che per via della sua
“ letteratura furlana, el xe cognossudo più de tanti omenoni che no i val
“ un scheo... (*dî li si capîsc che nò viodin l'ore di 'vê-mi a Podestât*).
“ E alore 'o hai dovût cedi e partî cun lôr tant plui che a Udin 'o varèss
“ dovût lâ lo stess.

“ El rest, sior Meni benedèt, 'a lu vará viodût áncie lui e specialmentri
“ el discòrs (*cui s'al ricuarde plui?*). Sí, 'o sperî che el discòrs lu vedin
“ fotografât áncie chel. 'O sai dome ch'al finive cussì, cu-lis peráulis di un
“ gurissán plenis di sentiment:

“ Vive el Friûl di chesta e di chê altra banda

“ Vive la Pátria pícula, vive la Pátria granda;

“ e ariviódi-lu la setemane che ven.

(*al plee la lètare e la met 'te buste; intánt al fevele sôl*)

El sturnimént dai batimáns al mi durará ancemò qualchi setemane 'o
soi sicûr; se, cun dut chest nò mi cápìte la podestarie, 'o devi proprit di
che el diaul al si petene la code. (*al leche la gome e al siare*)

SCENE SECONDE

(Cándide entre da la puarte comune cun-t-une gran guantiere plene di
corispondençe).

CÁNDIDE — Ca, ca, e po' al zure di volê-mi ben: 'a-nd-há morosis di vendi...

TITUTE — Cumò lu capisc el to mâl (*j dà la lètare par stôr Meni*)

CÂNDIDE — E cheste?

TITUTE — In pueste dal momént.

CÂNDIDE — Ch'al viodi ch''a-nd-è tre o quatri di rassicuradis. 'O hai dovût firmâ.

TITUTE — Va ben... Va lá, va lá a la svelte.... te's mostrarei áncie a ti, ciare la me gelosute.... (*cun galantarie*)

CÂNDIDE — (*lu lasce implantât e 'e s-ciampe*) E ch'al vadi là.... morositi ch'al'è un.

SCENE TIARÇE

(*Titute sôl al scomençe a viarzi lis lètaris*) Chestis prime, che son rassicuradis come che dis Cándide (*al viârz e al lèi*)

Caro ed egregio sig. Titute Lalelle

“Due lettrici assidue ed ammiratrici delle sue lune, desiderano fare la sua personale conoscenza. Nella prossima luna ci risponda.

“Dôs ciargnelis sul fâ di Cándide.”

(*feliç*) 'O soi diventât l'idolo des sioris sençe vistî-mi a le mode come lis mës fëminis. (*al si prepare a viarzi-nt un'altre*)

Eh! ciò': bisugne nasci simpatichs. (*al ciale l'indirîç e al devente blanch*)

'E jé chë stessee caligrafie de lètare anònime che mi è rivade chë altre di, cu-lis fotografiis des mës sioris in custûm di bågno insieme cun chei siôrs...

(*al si sinte su-la ciadree parcè che lis giambis nò lu tegin sù*) Eco une lètare che ha la potence di ribaltâ-mi l'ánime prime ancemò di viârz-le.

Ah! la glòrie, la glòrie... e ca di sicûr si trate di gloti, di dovê tasê par nò fâ ridi la int (*la bute vie*). Ciò'l va al diaul nò ti viârz....

(*Cándide stand dèntri 'e ciante*)

Sintît chë ánime noçente. Je almancul nò ha 'ta-l ciáv che el so Tite e il risòt cu-lis quais... e jo 'o hai l'infiâr 'ta-l'anime.

Signôr, Signôr, cui sa ce tantis che ma-nd-há petadis chë malandrete di torseone.... (*al còr a ciapâ sù la lètare*) Ma che sedi ce ch' al ûl... e se l'è alch di mâl al sará un bon pretèst par fâ divòrçio. (*al viârz la lètare, al tire fûr une cartoline che al contemple un momént, po' al si abandone su la ciadree*).

(*disperât*) Ce vâl-ial, ce vâl-ial spindi dute la vite in sagrifissis pa-l ben di Esterine e di Tunín quând che la fëmine 'e fâs la mate?! (*al vai*).

SCENE QUARTE

(*Cándide entre in scuindón, 'e va a mèti-si daûr di Titute in mûd di viodi la cartuline che al ten in man*).

CÂNDIDE — (*cun meravee*) Un om cu-i cuárs (*'a fâs une gran ridade*)

TITUTE — (*sençe scompòni-si*) Mi han copât. Cumò nò mi reste che lâ a butâ-mi sot la muele dal mulín di Surisíns e finî-le. (*al dà la cartuline a Cándide*)

CÁNDIDE — Mat ch' al'è (*'e lei*) Bello è vederti con la frontè adorna
di lauro per la gloria e di due corna :

TITUTE — Va in-devánt va-lá...

CÁNDIDE — (*ridint*) Il fiero campion della fotografia
sull'onda cullossi con la tua Lucia.

TITUTE — A mi, corpo da l'ue, che dopo maridât mi soi simpri limitât a une
taçe di neî lá di Marzinoto e une sope di tripis lá di Martín!

CÁNDIDE — Al si bute vie par chel? (*'e si sbasse viârs di lui*) Corágio!

TITUTE — Sta tu almancul dóngie di me. Par l'onôr de famee 'o s-ciafojarai
âncie cheste. Ma nò sta lâ-mi vie.

CÁNDIDE — Po' miôr... ce vuèl-ial tant pensâ-j; al'è piês.

TITUTE — Tâl 'e fâs je e tâl 'o farai jo. (*la ciareçe*)

CÁNDIDE — Peciât che 'o dovarai lâ vie su-l plui bièl... dopo che 'o soi cussí
ben usade cun lui.

TITUTE — E dai simpri cun chei discòrs. Ma parcè us-tu bandonâ-mi, bièl pan
di sponge fres-ce? Parcè?

CÁNDIDE — (*che si lasce ciareçâ*) Nò olçi a dí-lu. 'Al'è un gran brut destín el
miò. Lui al'è un gran bon siôr, ma par me nò-l pò fâ nuje zaromai.

TITUTE — Caschi el mondo, corpo dal diaul. Fâs cont che 'o sedi to marít, o
to fradi. Has-tu qualchi displasê?

CÁNDIDE — Po' devènti-al mat cumò?

TITUTE — Nò Candidute mè. Tu tu hâs 'ta-l cûr qualchi displasê segrèt e cussí
lu hai jo. Sfoghín insieme el nestri dolôr e cussí nissún al podará ridi de's
nestris disgracis. Une volte podestât, 'o metarai a puèst dut-quánt.

CÁNDIDE — (*'e sint spuçe di brustulín e si jeve di colp*) Risòt cu-lis quais
adio!...

TITUTE — Po' nus tòcin-o dutis?

CÁNDIDE — (*'e s-ciampe in cusine*) Si puèsc butâ vie dut.

TITUTE — (*sôl*) Dutis, dutis e' tòcin quánd che scomensin.

E jo 'o hai invidâc duc-quânc a mangiâ. Pre Noçént, Venânçio cu-lis
mês riveridis sioris, Mòmolò, che 'co si trate di sbafâ, l'è simpri il prin...
(*al si ferme di colp. Un gran sussûr di puartis viartis e siaradis cun
fuarçe*) Ce susséd-ial cumò?

(*Nò-l fâs a timp di lâ fâr che al comparisc su-la puarte Venânçio
dut stralunât*).

SCENE QUINTE

VENÂNÇIO — (*al va cerciánd Titute*) Dove xelo, dove xelo? (*lu viòd*) Ah!
el xe lì.

TITUTE — Ce is-al suçedût?

VENÂNÇIO — (*nò-l ciàte pâs e al va sù e jù come un mat*) Me copo, me copo.
(*al si sinte*) Me copo, come che el xe vero Iddio.

TITUTE — (*sôl*) 'Co si è nassûc disgraciâc (*a Venânçio*) Ce is-al suçedût?

VENÂNÇIO — (*disperât cu-lis mânç 'ta-i ciavei*) Esterina, Esterina... a Venezia...
(*a sogèt*)

Otubar

Un furistîr, vignût a Cividât,
di fabricâ un cis-ciêl al si è pensât;
e che 'l sedi imponént ognûn pò crodi,
parcè che di lontân si lu pò viodi,
e vignînd da la bande de staçion,
sebén piçul, al fâs un figurôn,
e ai vècios murajôns de la citât,
al done un ciart aspiêt di nobiltât.
Ma iò hai sintût a di: Ma ce del diamber
han-o fat sù chel lûch ross come un giam-
e sençe direción, sençe armonie (ber,
e cu-i mûrs sençe sest e sençe rie?
Nò san-o nâncie doperâ la squadre,
che nò si viôd une fignestre quadre?
E po' ce coventâvin-o chês capis
e chêi casotos che nus parin nâpis!
Ah folch! l'ha concludût un talentôn,
e' han consumât di band masse modôn! ¹⁾

Contadîns, oramai ca nus bisugne
pensâ un pôch a parâ-si de zilugne.
Âncie al cavalîr Carli ²⁾, zovenût,
l'ha zilugnât su-l ciâv che l'è un pieçût.

In politiche 'o 'vin doi granc partîç
che, a Cividât, e' son cussî divîs:
I moderâç, *overo* i liberali,
e i catolichs, *overo* i radicali.

Siôr Momi Pini ³⁾ l'ha comprât un ciân
che a duc i ciâns di ca l'ha ciôlt la man.
'Us puarte, che bestiute benedete,
dutis lis quais maçadis, 'te sachete.

'Te-s sagris nò-l'è plui di lâ a balâ,
l'ha scomençât za un pièç a rinfres-ciâ.

Novembar

Chel mat dal ciapelôn l'è za lât vie:

1) La vile dal siôr Deni (Nísio) Gráighero
in forme di cis-ciêl.

2) Rinaldo Carli.

3) Giròlamo Pini di Percût, speciâr, diletânt
di ciâçe.

l'è tornât a Bologne za vot dîs.

Lui al scrîv in-te-i sfueis, lui al studie,
e al remene la polítiche cu-i pîs.

Lui l'ha simpri 'ta-l ciâv la so poesie,
dome par meti in burle i siei amis;
che 'l vadi al diaul e che nò-l torni plui
che culî stin plui ben sençe di lui.

Par sedi un pôch plui grant Gratón ¹⁾ al
un pâr di tachs alç une mieze quarte.
(puarte

Benele ²⁾, ciaçadôr, l'è dret co 'l smire;
son lis quais che nò van dulâ che 'l tire.

Sebén che siôr Gigín ³⁾
nò-l'è tant zovenîn
l'è simpri un galandîn
de l'ultim figurîn;
lui mò l'ha la passión par-sore dut,
di sedi a Cividât *il vero psut*.

Nò si sta mâl in plaçe cu-l tabâr
ma si sta miôr in ciase al fogolâr.

Decembar

Unviâr l'è vignût jû dut-quânt rabiôs
plen di sflâcie e di voje di durmî;
e il cîl dut-quânt un nuvolôn pelôs,
el fâs viodi la gnot âncie a misdî;
chel mostro di veciôn scûr e grintôs
al nus si è propri pognèt jû culî,
e par parâ-si ben l'ha tirât sù
un gran lençûl di nêf vignude jû.

Quând che un pócîe di int ven in citât,
e che in plaçe si fâs del movimènt,
su-la puarte viodès de "Societât
di tiro a segno", il nestri pressidènt.
El'entre e al jêsc come par di: cumò
di cheste puarte ca comandi iò. ⁴⁾

1) Prof. di Caligrafie, dit Fotèl.

2) Bepo Benele uscîr di preture, persone une
vore magre.

3) Gâbrîç.

4) Probabilmenti Vigi Carbonaro.

Gran zujadôr di balis, siôr Lurînc
l'è bon di vinçi e bevi un pâ di quînc
ma se 'l piârd al dis: ce-mût is-e stade,
si capîsc che nô jê buine zornade.

E' ocorin dei lavôrs a Cividât,
ançi par fâ-ju sù propri pulît
bisugnarèss che 'l foss dut-quânt sdrumât.
Par chest e' bastin i inzegnîrs del sît
ma par tornâ-lu, dopo, a fabricâ
architèç furistîrs dovîn clamâ.

(Di) Unviâr (a Cividât)

'Co covente di balâ
iò 'o mi ciali ca e culâ;
dut il spîrt de zoventût
dulâ is-el mai scuindût?
Nò l'impuarte di cerciâ-lu
nò podin mai plui ciatâ-lu.

Une volte pe-s fiestis si viodevin
a zirâ moscardîns duc plens di ardôr;
lôr balavin, saltavin, si gioldevin
a impastanâ matèç d'ogni colôr;
e i dis cussî passavin mancûl mâl
tant po' di parâ fûr il carnovâl.

A la sere in buteghe di cafè
si implantave partide di biliârd;
o-pûr sintâç in zîr su-l canapè
ciacarând si faseve vignî tard;
e in duc i mûç in buine compagnie
si passavin dôs oris di legrie.

Di vendemis si leve sù in campagne
cun gran trupe di sioris e di siôrs,
e si tirave fûr une cucagne
di polèç di bon vin e di liquôrs;
e co-la lune che faseve ciâr,
si tornave in citât par-sore il ciâr.

E in citât si ciatave pe-s contradis
des altris compagniis di sunadôrs
che levin vie fasînd lis serenadis
a chês frutis che çercin aventôrs;
parcè che alore mò âncie a lis fantatis
j plaseve un ninîn di fâ lis matis.

E i zovins dulâ son-o? Chest l'è lâ
a zirâ il mond in çercie di fortune:
chel altri su-l plui biêl si è maridât
e cu-mò, plen di fruç, al bat la lune;
il tiârç al si dá il ton di un omp di leç
e nô-l'ûl plui savê-nt di ciârç matèç.

Un tâl pa-i bai l'ha grande antipatie
dopo che qualchi amôr j è lâ a spiç;
e cu-mò al si ritire in birerie
e cu-lis chèleris l'ha i siei pastîç,
che infîn e' si ridusin, par il fresch,
'te cort a blestemâ un po' di todèsch.

I doi conç e' son simpri in gran ce-fâ,
Bepi ¹⁾ el'ha di cirî une duchessine;
Guglielmo ²⁾ al devi prest acompagnâ
a ciase une gentil baronessine;
e cun tante siorie simpri 'ta-i pîs
nò han mai timp di 'vê timp pa-i lôr amis.

Altris doi e' son umin di finance,
e simpri indafarâç a dâ-si ton,
e' zirin âncie lôr cun importançe,
pe-i palchs des sioris quan-che l'è veglión
tignînt sald in-tê-l ciâv dute la note
des fantatis che puedin puartâ dote.

Altris e' han nome in ment lis eleçions,
par fâ-si puartâ si 'ta-l municipi,
dand di bevi ai pandolos e ai mincions
che ûr sta a cûr la vitòrie d'un principi;
e invece il scopo lôr l'è chel di di:
"Consigliêr comunal son anca mi!"

E duc-quânc o par cheste o par chê
si cialin simpri come giâç e ciâns (stòrie
e se puedin di mâl e' van in glòrie
di chêi che son in chel momént lontâns;
se po' vegnin viçin: O amigo miò,
propri cu-mò disevi ben di vo!

Cun chist sisteme ognûn al pò capi
che nô si pò mai 'vê un ninîn di uniôn;
e chel che prin des nûv al va a durmî
'us dis la veretât che al fâs benón:
Il spirit di une volte el'è finît,
e nome i musonèç e' ciapin pît.

1) di Caporiâch. — 2) de Pup.

E' tegnin sald tre o quatri zoveníns il nodâr di S. Pieri ¹⁾ e siôr Coletto Pirone che 'l va in çercie di quintíns, e Pognic ²⁾ che 'l sospire il *pitocheto*, e siôr Zorç ³⁾ che l'ha simpri stòriis sèriis che pararessin bombis, ma son veris.

Àncie i tre cavalîrs dan del murbín a chê púare buteghe di cafè: i *cav.* Rinaldo ⁴⁾, Márçio ⁵⁾, Jacumín ⁶⁾, il flôr de zoventût del dí di ué; par merit lôr si pò, dopo misdí, qualchi mieze peráule anci-mò dí.

'Te-s fiestis poi 'vin doí che fan par e che de zoventût e' han dut l'ardôr; (cent,

1) Barcelli.

2) Il miedi dotôr Rico.

3) Pículi.

4) Carli.

5) Il cont inzegnîr Márçio de Portis.

6) Gabriç.

che san meti 'ta-l bal del movimént: uei dí siôr Sandro ¹⁾ e il biêl Ricevitôr ²⁾ duc-quânc chêi altris, iò nò sai parcè e' balin stand sintâç su-l canapè.

Cussí al va vie l'unviâr a Cividât, cussí si pò passâ-le in compagnie; e chiste nestre púare citât nomenade une dí pe' so ligrie jé diventade un gran convènt di fraris che fasin, come me, nome lunaris.

In-tâ-l nestri Consei municipâl e' han stabilit che duc i caretíns che van a-tôr e' vedin il ferâl. E i conseîrs, che son stâç simpri fins, e' han pensât che cun cheste decisiôn e' si sparagne l'iluminaçión.

1) Maçòcie, dispensîr des Privativis.

2) Rampi

LA STRIE par l'an 1892

PREAMBUL

Chel gran mestri di lunaris l'immortâl Pieri Zorût, tant laudât dai nestris paris, el saveve da-per-dût tirâ fûr il so interèss; si tratâss mò di gialínis, si tratâss mò di polèç, lui cun quatri peraulínis rivolzen'-si a chest e chel el mostrave che de glòrie el val miôr un caretèl; e cussí cun-t-une stòrie, e cu-l'altre al si inzeagnave tant di lâ a la mancûl piêç cu-l formént e cu-la blave, sin ai ultins dí del mès.

Cu-mò l'ere un bon gustâ, cu-mò l'ere un regalût; nissûn mai si è fat freâ, par judâ Pieri Zorût.

Àncie iò — benché nò sei come Pieri un gran poete — 'o mi dèu stricâ i çerviei par lâ fûr de la bolete. Àncie iò hai fat il progèt, par che vadi un pôch di miôr, di mandâ qualche biglièt lá di qualchi miò letôr:

"Caro amico, pel lunario mi bisogna del salame; e se vuoi, non fa divario, un pociatto di pollame."

*Per giutare un poco l'estro
ed il canto far più bello,
mi ci vuole un buon canestro
di bottiglie, o un caratello.
Certo son che spedirete
ogni cosa per la posta;
poi, con comodo, direte
tutto quanto cosa costa.,,*

Nò podeve une domande
jessi fate miôr di cheste:
Ma siôr sí, che un sòl mi mande
cheste picule rispuete:

*"Il salame sarai tu,
e salame di somaro;
dei polastri non ne ho più,
ed il vino costa caro.
Se tu vuoi sgionfarti a spese
della magra tasca mia,
io ti mando... a quel paese
col lunario, e così sia!!,"*

Oe, Furláns! nò crodarèss!
Ves-o fat il cûr di pierè?
Par vo-atris iò varèss
di zunâ matine e sere?
E se 'o crepi, la mè **Strie**
cui la fas-jal saltâ fûr?
Cu-la uestre economie
nò si campe, di sigûr!
Si sta pôch a dí: volín
viárs, pronostichs, lunaçions.....
quând che 'l mánçie un got di vin
si dovente duc minçions.
Puèd-ial scrivi mò un poete
propri dut chel che covente
con-t-ún litro di aghe sclete
e dôs fetis di polente?
E par chest seit generôs!
Za savêš dulá che 'o stoi;
nò stait fâ-si di tegnôs
áncie 'te-l nonantedoi.
Nò nò ocorín grandis spesis;
dut 'o ciapi, dut 'o ten;
iò soi omp sençe pretesis,
ogni pôch al mi sta ben:
Une bote di bon vin,

dôs dozenis di ciapóns,
del formènt, del cinquantín,
une cosse di moróns,
une pieçe di formadi,
vot o dís kilos di argièl,
gradirèss del bon salvadi,
del castràt e del vigièl:
un barìl di aghe-di-vite,
del salám e del persút,
o pluitóst une purçite,
che cun ché si pò fâ dut.
Vêš capít; 'o hai dít bastançe.
Quând che olês podêš mandâ;
e cussí cun 'ste sperançe
'o scomenci a strolegâ.

Pronostichs

Primevere 'e ven cun rosis,
cun garòfui, gelsomiñs
par ornâ des nestris sposis
i ciapie i peruchíns.

Hai mò pore che d'istât
sençe aghe, cun tante arsurre,
nò si puedi tirâ flât
né in montagne né in planure.

Ma di autún, se la tempieste
nò nus fâs qualchi magagne,
viodarín propri une fieste
di racòlt 'te-la campagne.

E l'unviâr? Po' come ogn'an
lará ben dome pa-l siôr:
E pa-l puer? Se 'l vará fan
che 'l ringraçi il Crëatôr.

Cussí 'e jé mò simpri stade
e bisugne, par cambiâle,
che il bon popul cambi strade
se su-l seri 'e l'ûl voltâ-le.

Che nò-l fasi come il bo
che un frutín lu pò guidâ;
se 'l capisc la fuarçe so
áncie lui comanderá.

E se nò... nò impuarte nie:
che 'l lavori da minçión;
lui che 'l zuni e la siorie
crepará d'indigestión.

Zenâr

Bon principi de l'an

E' colin parlaménç e ministeris
e' muerin papis, ress, imperadôrs;
e' nascin fruç, e' si emplin cimiteris;
e' si cambin duc-quânc e puers e siôrs;
in miêç a tantis mostris di miseris
ogni dí il mond al pâr che 'l mudi còrs,
ma il *Strolich* saldo, alegri e matarán
l'è simpri ca par dâ il *bon prin de l'an*.

Unviâr! mostro di unviâr; e qualchi-
el'ha lis simpatiis par 'ste stagiôn. (dún
lò, par miò cont, sençe ofindi nissún,
j-u metarèss in muèl 'ta-l Nadisón;
e lá che mi disessin se l'è miôr
patí un ris-ciáld o-pûr un rafredôr.

'O vin frêd: biele resón!
'e jé pûr la so stagiôn?

Chel tâl dal ciapelón ce fâs-iel ca;
nò puèd-iel mò a Bologne simpri stâ?
Is-el vignût par mèti-nus 'te **Sirîe**?
Se jé cussí l'è miôr che 'l torni vie.
Che 'l torni vie, ma che nò-l vegni plui
che 'l resti lá fra i maç compains di lui!

Sebén che la mê fêmine
— cialái-le dal ritrât —
si è fate áncie plui zòvine,
mi fâs diventâ mat;
l'etât nò conte nie
'e reste simpri **Sirîe**.

Fevrâr

Un frêd come chist an 'a-nd-è stâç pòs:
a Morandín ¹⁾ 'a si è inglaçât la vòs.

— Cossa vustu mascherina?
Chi mai cerchistu carina?
— Soi vignude a procurâ-mi
l'ocasiôn di maridâ-mi.

¹⁾ Pre Antoni, bass rinomât.

— O che furia! d'esser sposa
te ga tempo, bela tosa.
— El'è vèr che nò hai premure,
ma però jé masse dure:
son cinquante carnovai,
simpri 'o çîr, nò ciati mai!

Se nò-l fale il canociâl:
nêv par dut il carnovâl.

L'amigo Meni ¹⁾, diretôr gloriôs
del *Forumjuli* òrgano famôs,
nò-l veve avonde di chist sfuei culí
par contâ barzeletis; e cussí
lis giambis el'ha viârt, e al si è postât
cun-t-une a Udin e une a Cividât.

Març

Gran burás-cie stamatine:
tra pre' Antoni ²⁾ e tra Beline.
Son passâç dei ciârç proposiç
che pronòstichin sproposiç.

Lis piçocis son za ca,
si scomençe a sclopetâ
e il dotôr Fane intânt l'ha un gran çe-fà
migo par cori a trai, ma par mangiâ.

Vinçulín di primevere
si lu sint matine e sere
e áncie qualchi fantaçine
si lu sint sere e matine.

Primevere

Lis elecións (ed. 1894)

Stait alegriis contadíns
stait alegriis citadíns;
stait alegriis lavorénç
che cu-mò us fâs duc conténç;
'o varín par i mincións,
il confuárt des elecións!

¹⁾ Indri. — ²⁾ Morandín.

Il puer omp che tant al stente
par nò 'vê nâncie polente,
che 'l si meti in pâs il cûr
che larâ plui ben sigûr,
'co varîn par i minciôns,
il confuârt de's elejiôns!

Çe 'us impuârti-el se in famee,
nò 'vês nâncie une ciadree,
e se 'us tòcie di stâ in pîs
a mangiâ polente e fis?
'Co varîn par i minciôns,
il confuârt de's elejiôns!

Podará ogni basoâl
mandâ jû a la capitâl
un bocón di... deputât
ben passût e ben rangiât.
O çe gust, par i minciôns
il confuârt de's elejiôns!

Quând che i fruç e' sberlarân
domandânt un pôch di pan,
pensait pûr al deputât
che a discori vês mandât.
Lui dirâ che pa-i minciôns,
l'è il confuârt de's elejiôns.

Se 'us ocôr il deputât
par afârs di gravitât,
lait a Rome che lui l'è
in buteghe di cafè:
Lâ el rispuînd che pa-i minciôns,
l'è il confuârt de's elejiôns!

Cu-mò il popul al sfadie
par che il siôr nò-l fasi nie;
ma cussî plui nò larâ
ognidûn lavorará;
cussî disin ai minciôns,
chei che fan lis elejiôns! ¹⁾

O basoâl! e il lavorént
mande i siôrs al parlamént!
Lôr a Rome — o crodarèss! —
van par fâ i lôr interèss!
Çe vantâç! E pa-i minciôns,
l'è il confuârt de's elejiôns!

1) Ed. 1894: dome al timp des elejiôns.

E la Ciâmere fâs leç
par che vadi simpri istèss:
*ossia il popol lavorare
e quegli altri manducare.*
Ma però par i minciôns,
reste il gust... de's elejiôns!!

Ce biele lune! 'o soi propri inciantât
a cialâ lis beleçis del creât;
sebén ch' 'o hai simpri vût, fûr da la scune
lis mès finançis a lusôr di lune.

Avrîl

Ca e' son tant liberai, che il Cumissari
par Cividât l'è un rivoluzionari.
E va-e-no-vâ che sin il Delegât
al sedi un petrolîr par Cividât.

Vigi Brusín, Paçian ¹⁾ e Bepo Venier ²⁾
son lâç a Viene da l'imperatôr,
par tratâ dei afârs de l'aleançe
e regolâ il contrât un fregul miôr.
Po' han mandât Bevilâque ³⁾ sù in missiôn,
par tirâ âncie la Rússie in-té l'uniôn.

Za si viodin lis violis pa-i rivâi
e si sintin i croç in-té-i fossâi.

Maj

Disin che il mès di Maj l'è il mès dei
e-pûr cognòsc un tâl, se mi crodès (muss
che l'ha tante di lenghe e tante orele
che 'l ciape sù del müss duc-quânc i mès.

E' han rasón (ed. 1894)

Zueânt di balis Straçulín
a Benele i dîs: s-ciapín!
e Bepût a Felicián ⁴⁾

1) Bepo.

2) Impiegât a l'ospedâl civich.

3) di San Pieri.

4) Bepo Benele uscîr e Felicián Straçulín
di San Pieri.

di rimando j dá dal cián!
Ce coventi-el fâ questión?
Duc-e-doi 'o vês rasón.

O ce lune invegnade:
'e jé ca une tempiestade.

Cheste volte l'ha fat il so dovê
persín il nestri Giovanín de quae.
'Te-s elejóns lui nò-l'ha volût savê
di puartâ in consei chê tâl marmae,
che di sei liberâl ha la pretese,
che cu-i cialunis jé cûl e ciamese.

E Giovanín ¹⁾ - chist l'è straordenari -
intânt che sacomavin il specòt,
un'altre volte l'è diventât pari.
Siché l'è lâ al sègio in plene gnot
sberlânt: — 'O vin vinçût! e par la glòrie
'o met a la me frute nom Vitòrie!

Jugn

E' son propri passâç biel-zà dîs ans
che l'è muárt Garibaldi come ué;
chel l'ere popolán, miei ciárs Furláns,
ma istèss al vâl pluì di duc-quánc i re.

Se nò fali, la tempieste
nus ûl fâ un pòcie di fieste.

'Te-s zornadis di fieste saltin fûr,
iò nò sai di dulá, ciartis veladis
e ciartis canis fatís a tambûr,
altis, neris, pelosis, roseadis
e ciárç gilè a ricáms, colôr surís,
ciárç pantalóns di panò sopra-fín,
ciartis scarpis lustradis a vernís
e ciárç quantóns di un bièl zâl canarín;
dut-quánt — últime mode dal bon-tón —
vignût di France cun Napoleón.

Instât

I provinçiai a Guriçe

Dut il mond leve a Guriçe,

1) Bront.

d'ogni part, d'ogni ciantón,
per sintí l'òpere gnove,
e per lâ a l'Esposición.
Di Triestíns duc plens i trenos;
Udinês a carovanis;
e caretis d'ogni bande
tant todes-cis che talianis.
Áncie chêi di Cividât
e' han mò vude la pretese
di lâ a viodi se a Guriçe
si pò lâ cun pòcie spese.
E par chist il dotôr Carlo ¹⁾
el'ha fat la decisió
di lâ jú cu-la famee
a gioldê l'Esposición.
L'avocat varèss olût
un bon ciâr cun doi nemâi,
ma la siore, che nò scherçe,
'ûl caroçe cu-i ciavâi.
Dit e fat da un naulisín
un landò si ciate fûr,
cun doi bieì pueris vècios
che nò s-ciampin di sigûr.

*
**

'Te plaçute di San Zuán
l'equipágio el'è fermât;
e chel mat dal ciapelón
di-zá in serpe l'è postât.
Siore Amálie ²⁾ e il dotôr Carlo
cu-lis frutis e il frutín
son za dentri, cun il cián
e la stie del gardelín.
La massárie nò la intínd
di fermâ-si a Cividât;
e áncie je di colocâ-si
per daûr 'e ha za ciatât.
E par-sore di duc-quánc
façolèç, capòç e sciâi,
tabârs, coltris, ombreníns,
e tre o quatri canociâi.
Pan e rost in-té-s casselis

1) Podreche pari di Guido.

2) La mari di Guido.

e salám, e un mièç botác:
Nò si sa çe che 'l pò nasci
quánd che si si met in viác.
A cialà la carovane
che va vie cun tant sussûr,
su-la puarte de-s buteghis
i curiôs e' saltin fûr.
Siôr Gaetán ¹⁾ cun duc i zovins,
la massárie di Faustín ²⁾;
e Cecón e il paruchîr,
Caporâl ³⁾, Ricardo Albín ⁴⁾.
Duc e' son vignûç in place
a ossequiâ la comitive,
e al momént de la partence
sberlin duc: Bon viác! Evive!
L'avocat, per la citât,
el salude cu-la cane;
e cussí za fûr des puartis,
trote vie la carovane.
'E si mande áncie une volte
un salúd di comoçion:
Cui sa mai se tornarín
al ciâr nestri Nadisón!
Il viác, nò ocôr di dí,
nò-l podeve lâ plui ben:
biele, strade, árie fres-cie
verç i monç, il çil serén.
I ciavai han fat onôr
a la gran raçe furlane,
siché in mancul di cinch oris
sin rivâç a la dogane.
Lá 'vin vût un açidént:
Une guárdie di gnûv stamp,
nus voleve meti tasse
sore il vin e su-l salámp.
Ma nô-altris, fat consei,
tirât fûr salámp e vin,
'o vin dut mitût in pançe
prime di passâ il confín.
Po' 'vin dît al doganîr:

1) Deganût che l'ha buteghe di coloniai.

2) Mediatôr.

3) Sorenón di Giovanín Bront.

4) de Bantie Cooperative. 'Te ed. 1894 si
lei inveçe: e Ricardo e Giovanín.

— Tornarín prest a passâ
par intánt, se 'l crôd, podín
culí dut depositâ. —
Lui l'ha dît, vêr cortesán:
— Quel che voi portare in panza
non pacâr nissuno dázio,
viva triplice aleanza! —

Nò ocôr che us disi il rest:

A l'Isónç po' finalmént
sin rivâç passánd lis stangis
che si pain ogni momént.
Par-ché l'Austrie, simpri chê,
'e conserve gran passiôn
di doprà cu-i siei sogèç
o lis stangis o il bastón.

A Guriçe sin entrâç
di gran trot a scoreadis;
tan'-che 'o vevi quasi pore
di ci-pâ quatri clapadis.
Ma, cialât la comitive,
e cucâç i doi ciavâi,
l'ha sberlât subit il popul:
— Compatit! son provinciai!
In-t-ún stalo di cariere
sin entrâç sençe malán;
e' 'vin nome masenât
cuintre il mûr un guriçân.

Cussí dopo dodis oris
di trotâ da disperâç,
in-te-i braç di ciârç amigos
a la fin sin dismantâç.
— O miei ciârç cividalês!
Ben rivâç! Vès di restâ!
Subit! A l'Esposición!
Svelç! In-bote, 'vin di lâ!
— Corpo e fûr! lassait almancul
che tirín un pôch il flât!
— Nossignori! Varès timp
di tirâ-lu a Cividât!
Chel di lâ a l'Esposición
cu-mò l'è uestri dovê;
po' varín passègio, l'òpere
e conçiârç in-te-i cafè.
— Po' paçiençe! çe del diamber!
Po' nò 'vin-o di mangiâ?

— Nossignori, che a Guriçe
sês vignûç par imparâ. —
Cussí duc in comitive
rassegnâç si inciaminîn:
paris, fis, massárie, ciân
e la stie del gardelîn.

*
* *

Çe spetacul grandîôs l'esposición! ¹⁾
'E pâr di maç propri une ciaponárie.
In miêç a dute chê popolaçión,
apene entrâç nus s-ciampe la massárie;
e l'avocat sturnît come un bocâl
al si piârd fra la bande musicâl.

Il frut al sberle: j han pes-ciât un pît,
e anci-mò donge l'ha domandât scuse;
la siore s'inrabie, la frute 'e rît
a un *Fraiter* ²⁾ inçerât, propri 'te muse.
E intânt che a cialâ a-tôr si rivoltîn,
'e nus robin la stie cu-l gardelîn.

Ma iò, denânt de-i altris, voi cialând
lis fantatis che vendin bicierîns;
e cucând, fevelând e spiçigând,
e' svolin come l'aghe i miei flurîns;
siché capisc che 'o fâs afâr plui bon
a lâ vie dret cialând l'esposición.

Angúriis, coçis, ue, patatis, fis,
imprès-c par ciapâ pesc, blave, soròss,
gubâtui e tramais par lis suris;
s-ciátulis, zeis, vascêi, sbrînciis e cose;
e nò-altris tra fasûi e ceseróns
fasevin la figure di melóns.

Vignûç fûr a la fin duc-quânc sturnîç,
nò 'us conti de-î cafè, de's bireriis;
dentri ca, fûr di lá, e simpri in pís ³⁾
vin gioldût dei conçiârc, de's sinfoniis,
ma però simpri cu-lis mans ai bêç,
come se fossin stâç turis-c inglès.

Si pajave a mangiâ — l'ere di just —
a bevi, a entrâ, scoltâ, nasâ, vedê;

fûr miêç flurín di ca par chel biêl gust,
fûr un flurín di lá sençe un parçè:
Siché, par nò pajâ plui di cussí
mì soi tignût di spandi... dut il dí.

*
* *

La sere a teatro grande produçión
de la "*Cavalerie rustique*" ¹⁾.
Iò gioldevi une vore in-tâ-l logiôn,
ma 'o vevi per-denânt un siôr in cane,
che 'co-'l si entusiasma a une romanze
al mi plantave i comedóns 'te pançe.

La massárie, in teatri mai plui stade,
in miêç a tant splendôr, a tante resse,
'e crodeve di sedi propri entrade ²⁾
in-t-une glésie che disessin messe:
siché, subit entrâç ³⁾, 'e mi si inciante
a çiri a-tôr la pile de aghe sante.

Dut somât il spetacul l'è lâ ben:
Boins artîs-c, boins i coros, buine orche-
mia il publich nò-l'è stât contént a plen, (stre,
ançi un siôr al diseve a la me giestre:
Ai cartelóns nò si pò crodi nie!
Quând vègni-e in scene la *cavalerie*?

Dopo tèatro 'vin di gnûv mangiât;
e fûr flurîns! e fûr la buine man!
E per fortune nò-l'ere restât
in dutis lis locandis che del pan.
Se nò, se vessin vûd qualchi portade,
figurâi-si çe fregul di impirade!

A la fin 'vin podût lâ sot la plete,
ma l'avocat l'è stât simpri dismòt;
lui nò-l'è usât, 'te so citât quiete,
a sintî lis caroçis dute gnot;
siché al petave simpri un gran s-ciassón
quând che 'l passave qualchi cariolón.

Quând che si 'vin jevâç 'vin barufât
cu-l parón de locande par il cont.
Ma nò-l'ha zovât nie, nus ha spelât
cun-t-une note di chel altri mond.

1) Si trate da l'Esposición agrícule-forestâl
che ha vûd lûch a Guriçe l'an 1891.

2) *Gefraiter* che l'ûl di sot o vicecaporâl o
apuntât da l'esercit austriach.

3) Ed. 1894: sintâç o in pís.

1) Prime òpare di Pieri Mascagni di Livorno
nassût il 7-12-1863, rapresentade dal 1890.

2) Ed. 1894: da-bón di sedi entrade

3) „ „ dóngie la puarte.

Furtune che la siore, cu-lis bielis
'e ha mitût in sachete sîs ciandelis.

Svelç! s-ciampîn in presse e in furie!
't-un momént e' 'vin tacât,
e si 'vin mitûç in-bote
in ciamin par Cividât.
Adio popul generôs!
Vive a te, Guriçe ciare!
si pò dí-lu in veretât,
tu sês áncie masse *ciare!*¹⁾
O zentil citât taliane
ti 'vin simpri un mont amât!
Ma a ciatâ-ti tornarín
'co varín ereditât.

*
*
*

Intánt corin i ciavâi
jú pe' rive de-l' Isónç,
par passâ sore la bárcie.....
ma 'vin pore di lâ in fonç.
Siore Amálie si spavente
'e ha un ninín dí tremarele,
e cussí 'ta-l mescedâ-si
'e nu-s fruçe une ciandele.
Sore l'aghe si va viè
che di móvi-si nò pâr,
ma in-té-l mièç de la corínt
un ciavál l'ha il mál di mâr.
Puer ciavál! cun chel incomud
el pátisc mò di sigûr!
tant che in-fin nò-l pò tignî-si
e al rigete.... par daûr.
A la fin il çil permèt
che rivín lá vie di-lá;
e, nò ocorarèss di dí,
áncie lí dovín pajâ.
'O passín Cormóns e il Judri,
sín in tiare di taliáns;
ca, l'è vèr, nò 'vin fluríns
però náncie carantáns.

1) L'Esposizione provinciál di Guriçe jê stade
viarte 'ta-l autún de l'an 1891. In ché volte
un florin di lá dal confin l'ere considerât come
di ca un franch benché al valèss plui di al
dopli. Al presínt i presic son i stess.

I ciavâi fasin la spiume,
ma 'e son simpri murbinôs,
sintín za l'odôr de stale,
e di lâ-j son seneôs.

*
*
*

Fin cúlí dut l'è lât ben;
però propri al fin de gite
dóngie il puínt di Cividât
ciapín sot une purcite.
L'acidént l'è straordenari:
al sucèt un tananai,
e il parón de púere bèstie
el nus ferme i doi ciavâi.
El pretínd che lu paín
per la bèstie purcitade;
e ciapánd il dotôr Carlo
el lu tire pe' velade.
E ca nasc une questión;
l'avocat nò-l'ûl pajâ
e chel cián di contadín
al continúe a corponâ.
Za si ingrume un trop di popul
che 'l si met a sivilâ;
po' l'arive il nautisín
che nus fâs duc dismontâ.
Al sucéd un brut afâr;
tire, mole, ciape, sburte:
Svolin áncie quatri grops;
a la fin, par fâ-le curte,
dute-quante la famee,
cun protestis, cun suspîrs
torne a ciase da la gite
jenfre doi carabinîrs.

Italiáns 'o savarês,
'vin il mâr a Cividât;
lait un pôch, se nò crodès
fur des quartis di citât.
'E han plantât 'ta-l Gorgh de Lese
quatri breis, e in-t-un momént
'e han fat sú cun pócie spese
un grandióss stabilimént.
L'Adriatic h'ha un difièt;

l'è salât, l'ha l'aghe mare;
ma chist ca l'è un mâr perfèt:
aghe blâncie, dolce e clare.
Da Vignésie e da Trièst
cun-t-il ciâld de la stagión
varín dut il mond forèst
in-té-l mâr del Nadisón.

Lui

Leandro Pup 'te-s grandis circostançis
l'ha une miss di ministro de's finançis:
al tache sú un linçûl per golarine
pontât da une corone moscardine.
Il vestiar po' l'è tant abondânt
che se j vegnèss — co-l va vie spaçizánt —
un sbuf di buere sot il veladón
al svolarèss par-aer come un balón.

Nò dîs po' nie di Bepi Caporiách¹⁾
che in quánt a mode nus met duc in sach.
Lui l'ha un gilè scovât in-t-ûn ciântón
di nò sai quâl domestich armarón,
dut blanch e ricamât, tant che 'l somee
il piviâl d'un cialuni d'Aquilee.

Tempieste, lamps e tons; cun chist istât
'o quartín pôcie blave su-l toblât.

Di tempieste 'vin vût un batibui;
corponón! mi displâs par i fasui!

'E vegnin ca i forès-c dut-quánt l'istât,
par gioldi un pôch il fresch di Cividât;
ma istèss chêi che al "*Friûl*,"²⁾ metin i pîs
e' son sigûrs di tornâ vie rustîç.

Avòst

Il dêt di Dio (ed. 1894)

L'an passât, come ué, 'ta-l mès di Avòst
l'è stât un tananai mai plui vidût:
iò, par dî il vèr, in-sómp de luminárie

1) Il cont Bepo Caporiách.

2) Famôs albergo di Cividât

'o soi restât dut-quánt il dí scuindût.
Però hai sburtât in-fûr il canociâl:
Çe diamber di davo! O çe sussûrs!
Saetis! lamps e tons! come se fossin
tornâc culî i todèschs cu-i lôr tambûrs.
Ma il piês el'è che dopo la sunade
'e han scomençâd legnadis par¹⁾ da-bón;
e tant fissis che in pôch 'e si ingrumave
une zae di tempieste par ciantón.

Un gran al mi ha sfondât il canociâl,
po' l'ha sbusât 'tu-n colp il taulín,
e dopo chest, colând su-l pavimént
l'ha spacât tre modóns di rebatín²⁾.
In campagne po' piês, che la tempieste
'e ha propri volût fâ la moscardine;
'e ha masenât la blave cussî ben
che tanc son lâc a ciapâ sú farine.

Lis viç 'e han fat il vin prime de l'ore;
in-fîn l'è suçedût un tâl infiâr
che l'istât, butât jû la vieste verde,
l'ha mitût la ciamese de l'unviâr.

"Dut-quánt chest tananai l'è il dêt di Dio,"
un predi l'ha vûd cûr di prediciâ,
"Il dêt di Dio — l'ha dit — che l'ha volût
vignî-nus un momént a visitâ."

Sarà come che 'l dîs, ma par me 'o speri
che il Pari Eterno, cu-l so inzén divín,
'a ueli meti, almancul per chist an,
il dêt al predi... lá che si capín!

Durlí al mi ha dit che ca di quindis dîs
varín une cucagne di pernis.

A Udin, la citât des gran risorsis,
e' ciatin simpri il mûd di fâ lis corsis;
però áncie ca si podarèss 'vê il luss
di fâ — baste volê — corsis di muss.

Per l'òpere di Udin 'e han affiss
un cartelón che 'l met "*ciavai in scene*,"
cun artîs-c di chê sorte si capîsc
che varán al spetacul simpri plene.

1) Ed. 1894: per

2) Se di *bagatin* 'orèss dî dal spessôr di
di cirche 7 centímetros.

Setembar

El'è vèr che l'è ciàld; si lu pò crodi;
ma che 'l sei frèd cu-mò nò jé pretese.
Iò mò vorèss tant ciàld di dovê viodi
lis fèminis zirâ sençe ciamese.
I umîns po' che fasin çe che ur pâr;
j permèt di là a-tôr áncie in tabâr.

Cun Fantín ¹⁾ si sint simpri une di gno-
L'an passât l'ha falât un jeur 'te cove; (ve:
e dopo che une quae 'veve ciapade,
s-ciampâ fûr da sachete el l'ha lassade;
e tant per fâ alch di gnûv áncie chist an,
al contín Pup el'ha maçât il cián.

Granc afârs e' han di 'vè mò i doi ban-
sore-dût cu-lis bancis di Trièst. (chîrs
Lôr cambin flurîns, flurîns intîrs
simpri a des sioris de-l'aspièt forèst;
in mût che, almancul par tre mès de-l'an,
lôr e' son simpri cu-la borse in man.

Aufûn

Gran ciaçe a Udin

O çe cãs, ciaçadôrs! O çe meracul!
O çe notiçie propri di contâ:
In-té-s campagnis d'Udin 'e han vidût
un vèr jeur, cu-la code, a passonâ.
Duc-quânc i ciaçadôrs armâç di sclope
apene che han savût de novitât,
cun dei quintai di pulver e balîns
son saltâç fûr a trops da-la çitât.
Su-l plaçâl de staçión si son ciatâç
pe' grande imprese pronç a marciâ a viste;
ma i capos prime di partî han volût
passâ dutis lis fuarçis in riviste.
Erin i zovîns plui valénç di Udin
in ordin di batae duc lineâç:
arcabûs su la schene, ciaçadore,
insome duc auâl bièl e montâç.

1) Contadín e ciaçadôr di Moimáns, dipendént
dal cont Pup.

Il siôr cont Bepo Pup, gran ciaçadôr
denánt di duc svolave vie a ciaval;
e l'avocat Gosèt trotave a muss,
come aiutánt daûr del generâl.
Il terôr dei colómbs, Carlo Rubín ¹⁾,
el'ere a capo ²⁾ de prime rie;
ciaçadôr di ciadree, dal tîr premiât,
ma masse grass par ciaçis di fadie.
Carlo Bráide ³⁾ al menave in biciclete
chel canonçin co-l quâl 'e l'ha maçât
la prime dí che l'è lâf fûr a ciaçe
dutis lis quais e i jeurs che l'ha ciatât.
El pò sedi áncie vèr, e iò lu crôd,
ma a proposit del fat, al mi ha dit un,
che in chê famôse dí de prime ciaçe,
di quais e jeurs no-nd-há ciatâç nissûn.
A capo ⁴⁾ di altris trops Otèlio ⁵⁾ e Varmo ⁶⁾
e Legnâç dúngie di Riçân Nardín, ⁷⁾
(chêi de grande scomesse dal ciapièl)
e per daûr il miedi Marzutín ⁸⁾.
Tite Volp ⁹⁾ al marciave cun Júrice ¹⁰⁾,
e j contave che un dí l'ère lâf fûr
quartând in-té çintúrie dîs cartucis,
e che cun undis l'è tornât indaûr.
Dut-quánt el'è za pront: duc cu-l fusil,
cun balis, cun mitrae, cun baletóns,
e cun curtisc par sbugielâ la prede,
e, sore un ciâr, di pulver doi cassóns.
A ciadene tignûç da vinc brachîrs
doi o tresinte ciáns di buine raçe,
che za cu-l nâs par-aer, spacánd la code,
e' sintin da lontán l'odôr de ciaçe.

1) Siôr un mond cognossût, dedit a la vite
sportive.

2) Ed. 1894: caporâl

3) Famôs cicliste.

4) Ed. 1894: al comând

5) Il cont Vico Otèlio cun palâç a Predamán
e su lis culinis di Buri.

6) Cont Varmo, che alore al stave a Buri.

7) Riçân N. impresari di costruçions ediliçis.
8) Dotôr Pauli Marzutín patriote garibaldín,
framassón e republicán, miedi, diretôr dal serviçi
sanitari a Udin.

9) Industriâl.

10) Il nodâr Toni Júrice laureât a Pádue
dal 1857.

Nomenât ciapitani dai brachîrs
el côr a-tôr dut-quânt indafarât,
Zuán Fantín, che a Moimâns ciaçând lis
il ciân del contín Pup ei-há svuarbât (quais
Gran ciaçadôr, l'è Zuán, che lis pernîs
el dîs che dome lui el pò maça-lis:
e di-fât 'co-l va vie cun dei balîns,
el torne simpri a ciase cun de's *balis*.
Dúncie l'è dut a puèst, e za lis trombis
e i cuârs di ciaçe segnin la partence,
ma dut in-t-ún momént si sint sberlâ:
— Alto! Fermait! Un fregul di paçiençe! —
I capos e' si fermin sbalordî;
la compagnie si urte e po' si sbande:
— Ce del diamber sucéd-iel? Di fermâ-si
propri 'te-l bon momént; cui mai coman-
Une ciosse da nie: Bepo Murât ¹⁾ (de?—
cu-i stivalóns ai pîs, pelîce in grope
dut-quânt plen di tramais, dome al si veve
dismenteât di ciapâ sú la sclope.
L'ha chel difiêt, bisugne compati-lu:
el dismentee la robe; ma del rest
in quatri salç el côr a ciase e al torne
e in dîs minûc el'è di za al so puèst.
Nò-l mán cie nie; jé l'ore di tacà!
Duc si molin pa-i ciâmps e pa-i vignâi;
si côr pa-i prâç, si mán cie pe' taviele;
si saltin lis ciarandis e i fossîi.
Per la campagne a-tôr, a-tôr cinch miis
l'è un movimént, un cori, un lâ indenánt
duc in çercie del jeur che za si cròd
di viodi tra lis verzis passonánt.
Sgarfând di ca e di lá, nasând pa-i sterps
e' han cirût par tre dîs matine e sere,
i ciâns e i ciaçadôrs, tant che pareve
che su chêi ciâmp 'e foss passâd la guere.
Ramâç sglovâç, pes-ciâç i semenâç,
spacadis pomîs, blavis masenadis,
e sbusadis ciarandis, sdrumâç mûrs,
vignâi butâç par-aer, viç sbridinadis;
sot il furôr di ciâns e ciaçadôrs
chês pûeris campagnis benedetis

1) Fi dal rèduce di Vile Glori oriúnd triestín,
Giusto Murât.

dal dit al fat nus han cambiât figure
come sot un passâç di cavaletis.
Ma il jeur nò-l salte fûr e si ha paure
di nò puartâ-nt a ciase la semence,
e strachs e disgustâç i ciaçadôrs
'e scomençin a piardi la paçiençe.
Quând che dut in-t-ún colp: punf! da lou-
'e si sint a sbarâ une sclopetade. (tàn
Ah chiste volte mò, mostro di un jeur,
al'è sigûr che te-la 'vin fracade!
Guidèt l'ha fat il colp da vêr maestri,
Frangipán ¹⁾ lu finisc a curtissadis
e per pore che 'l s-ciampi, áncie Gosèt
j tire da lontán quatri clapadis.
Duc-quânc i ciaçadôrs corin su-l puèst;
l'è propri un jeur cu-l ciâv e cu la code,
ross di pêl e pesánt tre o quatri kilos,
che in angunie par-tiare al si sacode.
Lu ciapin sú, lu lein traviars dôs stangis ²⁾
puartadis dai plui fuárç de comitive.
E duc trionfânc viârs Udin s'inciaminin
fra i contadîns che van sberlând: Evive! ³⁾
Dóngie lis puartis d'Udin a spietâ
— il telègrafo al veve za visât —
el'è il sindich Morpurgo cu-la bande
e cu-i prins personágios de citât.
Luçât, vistît da inglès, di ca e di lá
cialând se dut l'è a puèst, trote a ciavâl;
e, par meracul, in chel dí di glòrie,
nò-lè lâ, come il solit, 'ta-l fossâl.
In dôs riis i pompîrs e' fasin strade
al passâ de la nobil comission;
e 'co spontin lontán i ciaçadôrs,
dal cis-cièl sbarín salvîs di canón.
Dut il corteo traviarse la citât,
e i vígii cu-la cane e il veladón
e' son in gran çe-fâ par tignî in bande
duc i curiôs a pachis di bastón.
Si rive in plaçe, e lá duc-quânc s'ingrumin,
di re Vitório sot il pedestâl ⁴⁾;

1) Il cont Vigî.

2) Ed. 1894: Fra i contadîns che van sberlând:
evive! - E trionfânc viârs Udin 'e si inciamine -
la legre e vitoriose comitive.

3) Ed. 1894: pedestâl.

in alt continue a businâ il canón
e a bass si tache la márcie reâl.
Il síndich, sore un len mostránd la prede,
cun-t-ún discòrs al ciente il gloriòs fat;
ma il popul fâs un Oh! di maravee:
chel *cián* di un *jeur* al'ere propri un *giát*.

A Guriçe, zentil çitât taliane,
san simpri fâ lis corsis cun inpén:
L'an passât in chist timp e' han fat des
(fiestis
che in nissún mûd podevin lâ pluî ben.
Corsis di vèrs ciavâi, cun quatri giambis;
òpere sèrie, fuchs, esposición;
músichis citadinis, trataménç;
soreli di dí, la gnot luminaçión.
Ma miôr di dut jé l'ospitalitât
che mostrin i simpatichs guriçáns,
in mûd particolâr quánd che si trate
di fâ fieste ai lôr fradis taliáns.
Per ch'est un dí sperín di meti al puèst
di chê bandiere che sta lá pustice,
i tre colòrs taliáns cun scrit parsore
in-t-ún bièl ross di fûch: Vive Guriçe.

Otubar

Son partidis lis triestinis
saludadis dai banchîrs:
Lagrimutis, peraulinis
e tanc piantos, e tanc suspîrs,
che, senç'esageraçión,
si è sglonfât il Nadisón!

Lui el'è il miôr balerín
di Guriçe e di Trièst.
L'ha balât chist brâv contin
âncie a Viene; ma del rest
su la fieste di Prepòt
l'è colât jù di capòt.

Il cont Bepi Caporiách ¹⁾
l'è vignût a Cividât

1) Clamât Becanele.

par comprâ — l'ha dit — dôs bèstiis
su la plaçe del merciât.
Pocis ciácaris, ma faç:
l'ha comprât doi parussâç.

Un dotôr l'altre gnot l'è lât in jet
avilît, disperât: e ciapánd siún
l'ha dit: per me ce gran brute zornade
in dut il dí nò hai dit mâl di nissún.

Novembar

Nò si pò pluî zueâ: l'è un gran peciât
cun tanc balóns che 'vin a Cividât.

Furláns, corágio! duc a Cividât:
San Martín el'è ca cu-l so merciât.

Beline el mi ha contât che per viazâ
bisugnerèss che vessin inventât
il mût che duc podessin manovrà
par-aer i globos cun facilitât;
cussí l'ha fat intánt la decisió
di viodi il mond quánd che 'l vará il balón.

E i muss? (Ed. 1894)

Ce faran-o dei muss — diseve un tâl —
se duc cu-mò doperin il ciavâl?
El'ha rasón, puer ¹⁾ diaul, di dí cussí:
ognún al pense per ²⁾ il so avigní.

Decembar

Ca si crepe di frêd duc-quânc i unviârs
cun tanc di lôr che taîn i tabârs.

L'altre sere si ere za ingrumade
tante int a cialâ une robe in tiare
che taponave mieze une contrade,
come une çòcie di grandeçe rare.
Ognún faseve une suposiçión;
ma l'ere un tach che l'ha piardût Gratón.

1) Ed. 1894 puar

2) " " par

El' è un país di veros patriòc
per ch'est 'o hai simpatiis per Sandenêl:
ai vèrs principis di democraçie
chel popul simpri l'è restât fedêl.
Cu-mò po' el' ha capît il movimént
che 'l prepare pe-l mond un miôr futûr;
e in cheste vie di gnove civiltât
mai Sandenêl nò-l resterà in-daûr.

Unviâr

L' Òpere a Cividât 'ta-l 1892

Vigi Bront l'ha decidût
di lâ a viodi a Coneán
çe spetacul che lá han vût
par puartâ-lu ca chist an.
Per amôr di ch'est teatri
l'è corût di ca e di lá;
lui si è propri fat in quatri
par podê-le cumbinâ.
Ma çe diamber! Il *tenôr*
che 'l ciantave a Coneán,
l'è malât di rafredôr;
e il *contrâlt* l'è propri un ciân.
Mancul mâl la *prima dona*
che jé in vòs cussì e cussì;
ma áncie je — par la Madona! —
'e jé in jet su-l parturî.
Il *bariton* l'ha inglufît
une spighe di formént,
siché al sta par tirâ il pîd
e crepâ-nus 't-un momént.
Il *bass* po' sarèss perfèt:
lui par vòs duc j-u sfolmene;
ma, par di-le, l'ha un difièt:
al ven simpri ciòch in scene.
Cussì Bront l'ha concretât
che ciantânç di chê nature
'e-nd-è tanc a Cividât
che faressin miôr figure.
E sençe lâ a zirâ,
cu-i artîs-c che 'vin culî
si pò in-bote stampanâ
un spetacul di sturnî.
Dit e fat, l'è ognún contént,

duc si dan lis mans a-tôr
par fâ sù un divertimént
che nus fasi propri onôr.
La plui gran dificoltât
jé la scelte dai spartiç:
però dopo questionât,
si combine su doi pîs.
Chist l'ûl *Loingrin*, *Lucie* ¹⁾,
i doi *Foscari* ²⁾ l'ûl un,
l'altri, par economie,
bstarèss — al dîs — sôl un...
El'ûl meti il so parê
áncie Sandri dispensîr: ³⁾
Dové dar el *Pipelè* ⁴⁾
che quel lá se pol capîr.
Un l'ûl *Norme* ⁵⁾ e *Guarani* ⁶⁾
l'*Africane* ⁷⁾ o il *Parsifâl* ⁸⁾,
ma Beline al dîs cussì
che l'ûl *Carmen* ⁹⁾ con un bâl.
Duc d'acordo su la scielte:
Carmen sí, ma sençe bâl,
'e si tachin a la svelte
a prontâ un sucèss trionfâl.
La lôr part duc e' han di 'vê:
Ciapiatani Michelin;
Leandro Pup farâ par tre,
se nò avonde nò-nd-avín:
di *Zunighe* e *Remendâd*
di *Dancair*, di *Bregadîr*
e po' dopo i reste flât,
se ocôr di fâ l'*Ustîr* ¹⁰⁾.

1) Lucie di Lammermoor scrite dal 1835 dal famôs composîtôr Gaetân Donizèt di Bèrgamo (29-11-1797 — 8-4-1848).

2) Di Verdi, rapresentade la prime volte nel 1844.

3) Magòcie, dispensîr des privativis.

4) O il Portinâr di Parigi. Músiche di Serafín Amedeo De Ferrari di Gènoe (1824 — 27-3-1885) su perâulis di R. Berninzone.

5) Di Viçenç Bellini.

6) Di Carlo Gomez, rapresentade la prime volte nel 1870.

7) Di Jacun Meyerbeer di Berlín (1791 - 1864) rapresentade la prime volte nel 1870.

8) Di Ricardo Wagner, rapresentade la prime volte nel 1882.

9) Di Zorz Bizèt di Parigi (1838 - 1875) cun perâulis di Meilhac e Halevy.

10) Duc-i-cinch personâgios di Carmen.

Vigi Bront dis di podê
fâ il baritono e il tenôr:
Une sere di *Josè*
e che altre *Toreadôr* ¹⁾.
Ma Lurînc al va in furôr:
— Ti decidis-tu, sí o nò?!
Folch-ti-trai! Fâs il tenôr
che il baritono soi iò!
L'afâr serio 'e son lis sioris:
nò han corágio di ciantâ,
'e nò zovin tantis storis,
nò si vuelin mò ris-ciâ.
Dome l'Angeli, sigûr,
nò vorèss fâ-si preâ.
Ma jé za impegnade fûr
e per chest nò la 'vin ca.
Peró al ven siôr Tite ²⁾ e al dis:
— Se mê fie ciantâ nò pò,
per l'amôr del miò país
la so part farai iò.
Fane al dis: in quânt a lui
Micaela ³⁾ nus convén!
Mica-ela? Mica lui!
lò mò 'o uei fâ di *Carmén*.
Morandín cussí al fevele:
— Se nus máncie il zentil sess
iò 'o farai di *Micaele*
che par me l'è dut istèss.
Cu-mò l'è di pensâ ai coros
rinfuarcâ i vècios coris-c:
e par chest 'o vin i Moros
cognossûc par boins artís-c.
Per lis vòs nò si discôr:
l'inzegnîr l'è un bon secónd,
e Felîc un bon tenôr,
e siôr Zorz un bass profónd.
Edoardo insieme a Pieri ³⁾,
ciantadôrs sperimentâc,
larán ben; e in câs, 'o speri,
ur dará une-man siôr Blâs ⁴⁾.

E cu-i Lustichs, cu-i Bulfóns
cu-i Cascine e cu-i Paçienc
tremerán cun chêi canóns
i sofîc e i pavimenc.
A l'orchestre ocórerá
per rinfuarc diviárs strumenc,
ma nò-l'è di dubitâ
cun tanc "otims elemenc".
Par il flaut Fane dotôr,
el si impegne vulintîr,
pe-l violín nò 'vin di-miôr
di siôr Jacun ¹⁾ cavalîr.
Quânt a Gigi ²⁾ l'ha di-zá
scomencât di dí e di gnot
cun gran ánime a provâ
esercicis di fagòt.
Diletánt di violín
Morgânt ³⁾ l'ere di sigûr;
e in chist câs 'o fararín
che lu torni a tirâ fûr.
Pe-l violón Bepo Benele ⁴⁾
scriturâ-lu podarín,
vignûl sú a la buine scuele
el sta a pâ di Serafín.
E po' insome in quantitât
'vin ciantânc e sunadôrs;
nò si sa-el che a Cividât
duc è nascin professôrs?
Ma l'è un mâl: se duc e' son
a sunâ opûr a ciantâ,
in-te-i palchs 'o in-tá-l logiôn
cui si vâd-iel mò a sintâ?
El'è vêr, el'è verissin
che a la fin al sarèss miôr
che i ciantânc e' si sentissin
a ciantâ sôl fra di lôr.
Ma chest nò-l sarèss decôr;
i ciantânc e i sunadôrs
e' han bisugne par l'onôr
di 'vê un pòs di spetatórs.

1) Personágios di Carmen.

2) Angeli, il parí de famose diletánt di ciánt.

3) Duc cinch fradis Moro.

4) Il parí dai Moros.

1) Il dotôr Gabriç.

2) Gabriç.

3) Rugero.

4) Uscîr de preture, mieze caie.

TITUTE — Malorate!

VENÂNCIO — Me tradiva con un marchese de Napoli.

TITUTE — Numar doi.

VENÂNCIO — El cuor, el cuor Sior Tita, el cuor (*al tire fâr da sachete une cartuline*) Tutto el xe finio, tutto, no me resta altro in sto momento. (*al vai*)

TITUTE — (*al ciape la cartuline*) Come la mê... cu-i cuârs âncie a lui. Ma che 'l folch mi trai; ch'al sinti siôr Venânçio: nô e' sin omps...

VENÂNCIO — No, in sto momento, mi son el piû disgraziâ che esista su sta terra.

TITUTE — Ma din-si la man alore, siôr Venânçio, e consolîn-si. Ch'al si calmi e ch'al mi disi cui ch'al puêsc jessi plui disgraciât fra jo e lui (*al tire fâr âncie la so cartuline*) Ch'al viodi.

VENÂNCIO — Precisa della mia!... Allora anche lui...

TITUTE — (*rassegnât*) Anche mi...

VENÂNCIO — (*disperât*) O Dio, che fameia sporcaciona.

TITUTE — Capis-o ânimis?... Fameia sporcaciona...

(*Cândide entre in scene*)

VENÂNCIO — (*ciaminând sù e jû rabiôs*) Tuto xe finio fra nualtri, tuto: amor, amicizia, stima...

TITUTE — (*a Cândide che jê su-l'usc*) Puarte ca la flas-ce dal ratafiâ. (*Cândide vie*)

VENÂNCIO — Arivederlo... arivederlo...

TITUTE — Ma jo 'o ven cun lui.

VENÂNCIO — Me copo; arivederlo.

TITUTE — (*ferman'-lu*) Ma se lui al va a copâ-si, bisugne che jo j vegni daûr. Nò sin-o 'ta che stessee condiçion?

VENÂNCIO — (*al torne a sintâ-si e al vai*)

TITUTE — (*al procure di calmâ-lu*) Siôr Venânçio, siôr Venânçio, e se 'o-j disêss che âncie jo in un prin momént 'o mi vedeve za cadavar, ma che cumò, dopo chest gnûf fat, 'o pensi che qualchidûn al si vedi fat scherç di nô-altris.

VENÂNCIO — Fosselo vero!

TITUTE — Guerra, guerra siôr Venânçio, guerra ad oltranza.

SCENE SESTE

(*Cândide entre cun la flas-ce dal ratafiâ*)

CÂNDIDE — Eco la flas-ce dal ratafiâ. (*interompînd*)

TITUTE — (*a Venânçio che l'è simpri abatût*) Ch'al bevi! E tu, Cândide, viôd di comedâ a la miôr in cusine.

(*a Venânçio*) Ch'al bevi (*Venânçio al bêv*)

(*a Cândide*) Apene che Lúcie e Esterine 'e rivin cu-l gablón ven a visâ; has-tu capît? (*Cândide 'e va vie. Venânçio al bêv*) Ch'al bevi, corpo de corosse. (*al torne a impinî*)

(*sôl*) Orpo! nô varêss mai crodût che un spiciâr ch'al fâs píruilis al 'vess podût inamorâ-si in chê maniere.

(*Continue*)

Mi clamin rose...

Mi clamin rose o flôr
al par dai siûns dorâç dal prin amôr...
E bieles 'o soi... tan' bieles...
quan' che niçade a planch da bavisela
'o movi 'l ciâf, incoronât di fueis,
e invidi lis paveis
a morosâ cun me... I miei morbèss
nò son che lamps sflurîç... e pur instèss
che 'l vint al mi dispiârt
jò gioldi l'ore e nò foi mai di-tuârt.

Bussade dai suspîrs da primevere,
ardinte di fogôr,
'o meti sù la vere
e 'ta chel fuch m'inflami e voi in amôr,
inghirlandânt i rams
di mil tapêç rosâç e di ricâms.

Çimût ch' 'o nasci 'a nò-lu sai... Soi fie,
'o crôt, da tiare e di chê lûs çidine,
che, lusignânt, 'a impie
el mar par fâ gotâ la pluvisine
che mi rinfres-ce i piç
e j dá le vite ai bútui miêç flapiç...
Ogni matine 'a mi disvei bagnade
da' gotis di rosade,
e chei umórs, sflamiâç dal prin albôr,
'a mi ristorin tant ch' 'o resti in flôr...
Nò-nd-è colór in çil
ch' 'o nò-lu puarti intôr el mès di avrîl...
La tiare 'a mi regale :
e çufs e flochs e penacûç di gale...
l'arch di San March impín ¹⁾ mi done i siei
sflandórs plui bieî... e 'o screi...
ogni stagion, che ven, un gnôv vistît
flamânt e culurît
opûr... un biêl custúm
cessût ²⁾ di viludín... Nò-nd-è nissún
che 'l podi fâ chel tant,
che dómè la nature,
je sí che sâ fâ dut e çe ch' 'a spant
intôr ridínt l'è come une piture.

1) Infín ? — 2) Tiessût.

'Co mi dispoi avuâl,
mi pogni a planch par fâ di ciaveçâl
a qualchi pûere sùr
che 'a clope e nò-nd-há fuarçe a bati dûr,
e ch'ogni tant 'a mude
i siei camúfs ganzânç di sede crude,
biêl sparniçânt intôr
i siûns d'inciânt da primevere in flôr...
Ben prest un gnôf zermôi
al bute e un'altre sùr 'a viarz i vôi
curiôs e inemorâç,
che bramin sol di jessi soreglâç...
Cussí la mê famee,
sparínt, 'a mene e biel 'a si doplee.

Jò cresci da-par-dút dulá che 'l çil
al mande qualchi fil
di lûs e di soreli
e un fregul di sglavín par che mi spieli...

Parfín 'ta-l'aghe 'o nasci imporporade,
e blance e rose e zale e verduline
al par da aurore in-sòmp da mont Cianine...
E vie pa' gnot stelade
'o zuji, scherçânt, cu-l vintisèl ferbínt,
che, dindulânt, mi nine ;
e 'o soi cussí ninine,
che 'ta-i riflèss di arínt
da l'aghe in muvimént,
mi ciati in braç di dut el firmamént...
intánt che i venchs, che intôr mi fan co-
'a svintin lizeríns, (rone,
sfloránt beâz i miei cordòns lusínç,
che 'l vintisèl mi done
par fâ-mi ingialuçâ. ¹⁾
E jò, pognete in schene, 'a stoi cialá
la lune in alt, che splent,
spielánt intôr e amôr... e firmamént...
Sol 'ta-l blancôr dal dí, velât da' monç
e saludât dai glons
di dutis lis ciampanis,

1) Insupiarbí.

'a mi dis-cianti a planch tra i cuèchs da'
(ranis...)

'A torne la ligrie
e i croç e i muchs mi teginn compagne...
Ma 'co, cuacânt in grun, a' saltin fur
par còri-si daür,
l'è segno che un burlàss
al ven burínt par fâ-nt un pôch di s-ciàss...
Jò, svelte in'lore, 'a mi taponi ben
e 'o spieti çe ch'al ven...

Ance 'ta nêf, lá-sú fra mièç i creç,
jò sponti blance, blance e viludine
come la flôr dal zeç:
e lá soi la rigine
dai pichs, dai nui, dal mont indafarât,
che nò-l cognòsc bontât...
Lá-sú jò vivi in siùn...
e 'o soi di duc... e stele di nissún...

Planchín... di-bòt sof-vòs,
el gri avostân mi conte la so cròs:
a' son dolòrs, passiòns, travais, tormenç
e afièç... E chêi lamènç,
che, su-l colâ da sere,
a' si disvein lunch-fúr i boschs e i prâç,
a' son suspîrs di pâs...
o invîç di amôr o ciànç di sfide e vuere...
Çe impuárti-e mai, se 'l ciente di lancûr,
'co 'l ciânt 'a j ven dal cur?...
Nò-l ciânti-e par so cont
l'albe, che criche, e 'l rai, che 'l va a
e in font dal mar s'imbuse?... (tramont
E-púr... nissún nò-l sa çe che gi bruse:
che dome jò che nò lu cioli in zîr,
anzit, se mai, lu scolti vulintîr...
E lui, contènt mi zorne el so gri-grí,
'co-l viarz i voi fin prime di murí.

Nò saí parçè... e-púr... nò-nd-è pavee,
che, svoletânt intôr
dal miò gurmâl, 'a nò si poji su-l ôr...
Nissune maravee,
se apont par-chist lis âç
si sintin su-l miò grin,
sflurît su-i ciâmps bussâç da l'ajarin...
La mêl 'a scor dai càliç travasâç

su-i bechs dai scuâms golôs
di vite e faturôs.

Pontade su-i ciavei... o donge 'l sèn
di qualchi fantaçine,
'a soi bramade al par da stele alpine
e duc mi vuelin ben...
Nò manci mai ai bai...
'ta' rogaçiòns... su-i abiç nuviçiai...
e gnot e dí, e fieste e dis-di-vore
'a voi daur-mán in vore,
che ance su-l'artâr,
jò inflori i sanç par-fín 'ta-l cûr d'unviâr...
Mi pojín par-mís da scune,
squasin speránt ch' 'o sedi la furtune,
sençe pensâ-gi ai muárç che jò compagni...
E-púr 'a nò mi lagni,
se par confuárt 'a voi cun lor dulá
che nò si pôt tornâ...
Flapide e sece 'o resti tra i ricuárç,
che vivin dopo muárç...

Ma dut çe ch'al tramonte al si confont
tra i gors buring dal mont.

Passât l'è 'l timp da' bieles primevere...
passât al'è l'istât e za la buere
'a puarte intôr lis primis zulugnadis
e i siei mungulamènç...
E lis mès fueis seciadis
'a colin jú da pîç dai crisantèns,
che, in plene sfluridure,
'a sfidin duc i vinç e la criure...

Intôr nò son che rosis da' passiòn...
dome la muárt 'a nò cognòsc stagión!

TITE DI SANDRI

Guriçe, 'ta-l Zuin 1928. (Dialèt di Cormóns)

GRAGNELÙS - Rimis gurissanis di Marmùl Gurissán

Gurissa 1929 — Presin L. 150

Secônd il nestri sisteme dut si ridûs a cognosci ju esemplis tipichs che stan in mieze rie val-a-dî: *çuf, zuf, duc, fresch, frès-cie, nasc.*

Al' é ben pôch, ma almanco chest bisugne imparâ a cognosci e tignî presînt. Si capîsc che cui che l' ha man in paste, cu-la leture di pocis riis al rigiave di be'-sôl lis rêgulis che son concentra-dis in chei pôs esemplis fundamentâi e carateristichs.

Podarîn 'vê sbalgiât ma sperîn che si ritegnerâ çai galançumign che lis intençion e' son retis.

Diclarîn che nò 'vin afât rinunçiât a ritignî che la grafie plui adate al furlân 'e sei chê de lenghe internaçionâl Esperanto la cui introduçion, dopo la vuere, si presentave di une estreme oportunitât pe' manciance, in comêrcio, di libris furlâns.

Bastarêss considerâ che cun chel alfabet, cui che nò-l sa di lètare, al pò imparâ a lêi e a scrivi in metât timp e fadie di chê impiegade usând il sisteme tradiçionâl, e naturalmentri cu-la sicureçe di fâ manco fai di ortografie 'ta-l cors de vite.

A proposit po' des contradicions de grafie 'taliane, il Pirone a págine XXIII dal classich vocabolari si esprim testualmentri cussí:

Quel fanciullo (che istruite nella computazione) se fosse uomo, avrebbe pieno diritto di ridervi in faccia!

Ben, chei pòpui che nô-altris ritignî miêc barbars, val-a-dî i croác e i slovêns a la metât del secul passât e' han vût il judîç, il corágio e il patriotismo fondât sul sacrifici, di abandonâ la grafie tradiçionâl par adotâ chê moderne e scientífiche, per cui ué e' puedin vantâ-si di 'vê l'alfabet il plui façil, sempliç e raçionâl dal mond civilizâd.

Recensiòns

STURNI dott. EDOARDO - Le quattro principali industrie casalinghe del Goriziano.

Relazione del Segretario dell'Istituto per il promovimento delle industrie del Friuli Orientale in Gorizia. Ivi 1928 VII.

Son consideradis dal pont di viste da orîgine, svilûp, vicendis e stât atuâl lis indústriis casalinghis dei *merlêç di Idrie, de's ciadreis di Marián, de's cestis e altris lavôrs in venchs di Fojàn e dai susîns sechs, spelâç dal Cueli.*

Il diligênt studi dal Dot. Sturni al merte di sei let e ponderât da dug chêi che si interessin su-l sêrio dal svilûp economich de nestre regiôn.

Un Istitût análogo a chel di Guriçe, che l'ha une biblioteche speciâl veramentri notevul e une sede decorose, al mánçie assolutamentri 'te provîncie di Udin.

Si sta preparânt la seconde ediçion dal biêl lavôr.

Publicaçions rîcevudis in omâgio

Scritti friulani di Caterina Percoto con uno studio di Bindo Chiurlo - Udine 1929.

ZOTTI RUGGERO - *S. Vito nella Storia del Friuli* - Portogruaro 1928, grosso vol. illustr.

RANIERI MARIO COSSÀR - *L'industria del vetro nell'Alto Goriziano* - Trieste, 1926 illustrato.

— DI ANTONIO REBOLO *pittore* - Venezia, 1929

— PARENTIUM - *Guida storica di Parenzo* - Pianta ed illustraz. della città. Parenzo, 1926

I sôl abonâç (che varàn pajât) cu-la quinte dispense riceveràn la prime tàule cun quatri ritrâç di personis benemêritis de furlanitât.

Gerênt responsabil Dotôr A. TILIN